



Landsbankinn hf.
Lilja Björk Einarsdóttir, bankastjóri
Austurstræti 11
101 Reykjavík

FORSÆTISRÁÐUNEYTIÐ

Stjórnarráðshúsinu við Lækjartorg 101 Reykjavík
sími: 545 8400 postur@for.is
forsaetisraduneyti.is

Reykjavík 1. júlí 2022
Tilv.: FOR22060031/3.5

Upplýsingalög, nr. 140/2012, taka til allrar starfsemi stjórnvalda og auk þess til allrar starfsemi lögaðila sem eru að 51% hluta eða meira í eigu hins opinbera, sbr. 1. og 2. mgr. 2. gr. laganna. Þau taka þó ekki til lögaðila, sem sótt hafa um eða fengið opinbera skráningu hlutabréfa samkvæmt lögum um kauphallir, og dótturfélaga þeirra.

Í 3. mgr. 2. gr. upplýsingalaga er kveðið á um að ef starfsemi lögaðila sem fellur undir 2. mgr. 2. gr. laganna sé að nær öllu leyti í samkeppni á markaði geti forsætisráðherra, að fenginni tillögu hlutaðeigandi ráðherra eða sveitarstjórnar og umsögn Samkeppniseftirlitsins, ákveðið að hann skuli ekki falla undir gildissvið laganna eða dregið slíka ákvörðun til baka. Þá er jafnframt kveðið á um að forsætisráðuneytið skuli halda opinbera skrá yfir þá lögaðila sem hafa fengið undanþágu samkvæmt framangreindri málsgrein, og skuli undanþága einstakra aðila endurskoðuð á þriggja ára fresti. Ákvörðun um undanþágu tekur gildi við birtingu hennar í B-deild Stjórnartíðinda.

Í undanþágu á grundvelli 3. mgr. 2. gr. upplýsingalaga felst að viðkomandi lögaðila er ekki skylt að afgreiða beiðnir um aðgang að gögnum sem settar eru fram á grundvelli upplýsingalaga.

Við birtingu auglýsingar nr. 600/2013 tók gildi sú ákvörðun forsætisráðherra að Landsbankinn hf. skyldi undanþeginn gildissvið upplýsingalaga og skyldi undanþágan endurskoðuð eigi síðar en 1. júlí 2016. Með auglýsingu nr. 581/2016 var undanþága Landsbankans endurnýjuð og skyldi hún endurskoðuð eigi síðar en 1. júlí 2019. Undanþága Landsbankans var endurnýjuð með auglýsingu nr. 625/2019 og skal hún endurskoðuð eigi síðar en 1. júlí 2022.

Með bréfi, dags. 23. maí 2022, óskaði Landsbankinn hf. eftir því að fjármála- og efnahagsráðherra beindi því til forsætisráðherra að Landsbankanum yrði áfram veitt undanþága frá gildissviði upplýsingalaga. Í bréfi fjármála- og efnahagsráðuneytisins til forsætisráðuneytis, dags. 7. júní 2022, kom fram það mat ráðuneytisins að engar forsendur hefðu breyst í starfsemi bankans og þau rök sem undanþágan byggði á ættu enn við. Landsbankinn uppfyllti því ennþá skilyrði upplýsingalaga um undanþágu frá gildissviði laganna. Að því virtu lagði fjármála- og efnahagsráðherra til við forsætisráðherra að Landsbankanum yrði áfram veitt undanþága frá gildissviði upplýsingalaga.

Forsætisráðuneytið óskaði eftir umsögn Samkeppniseftirlitsins um tillöguna með bréfi, dags. 7. júní s.á. Í

umsögn Samkeppniseftirlitsins, dags. 20. júní, kemur fram að rök standi enn til þess að Landsbankinn hljóti undanþágu frá upplýsingalögum skv. 3. mgr. 2. gr. laganna.

Í almennum athugasemdum í greinargerð sem fylgdi frumvarpi því er varð að upplýsingalögum nr. 140/2012 kemur fram að gert sé ráð fyrir því nýmæli að upplýsingalögin skuli, auk allrar starfsemi stjórnvalda, taka til allrar starfsemi sem fram fer á vegum einkaréttarlegra lögaðila sem eru í eigu hins opinbera að 51% hluta eða meira. Í þessu felist umtalsverð rýmkun á gildissviði frá þágildandi upplýsingalögum. Að því þurfi þó að gæta að í þessu felist ekki sjálfkrafa að allar upplýsingar sem þessa lögaðila varða verði aðgengilegar almenningi. Áfram sé byggt á þeirri reglu að vegna samkeppnishagsmuna sé heimilt að undanþiggja ýmsar upplýsingar aðgangsrétti almennings. Undantekning 3. mgr. 2. gr. sé þannig fyrst og fremst til hagræðingar við beitingu laganna.

Í athugasemdum við 2. gr. í greinargerðinni segir enn fremur að undanþáguheimild 3. mgr. 2. gr. verði aðeins beitt ef starfsemi viðkomandi lögaðila sé að nær öllu leyti í samkeppni á markaði. Skilyrði þess að undanþágunni verði beitt séu því í grundvallaratriðum þau að starfsemi viðkomandi aðila geti ekki talist til hefðbundinnar opinberrar starfsemi, svo sem þjónustustarfsemi sem fram fari á grundvelli laga, og að starfsemi hans sé að nær öllu leyti í samkeppni við einkaaðila. Þá er tekið fram að ákvörðun um það hvort tiltekið fyrirtæki geti fallið undir undanþágureglu 3. mgr. 2. gr. verði að byggja á sérstöku mati á starfsemi viðkomandi fyrirtækis og markaðsaðstæðum á því sviði sem það starfar á. Ljóst sé jafnframt að henni verði að beita af mikilli varfærni og er m.a. vísað til þess að skv. 4. tölul. 10. gr. laganna sé heimilt að takmarka rétt almennings til aðgangs að gögnum vegna samkeppnishagsmuna opinberra fyrirtækja og stofnana. Sú undanþága ætti oftast að nægja til að tryggja samkeppnislega hagsmuni fyrirtækja og stofnana sem eru í eigu opinberra aðila. Með 3. mgr. 2. gr. sé á hinn bóginn leitast við að einfalda afmörkun á gildissviði upplýsingalaga gagnvart þeim fyrirtækjum sem einvörðungu, eða að langstærstum hluta, sinna starfsemi sem er í samkeppnisrekstri.

Niðurstaða

Landsbankinn hf. er fjármálafyrirtæki sem hefur starfsleyfi sem viðskiptabanki samkvæmt lögum um fjármálafyrirtæki, nr. 161/2002. Íslenska ríkið á nú 98,2% í bankanum og aðrir hluthafar 1,8%. Í umsögn Samkeppniseftirlitsins er fjallað um starfsemi Landsbankans og markaðsaðstæður á því sviði sem bankinn starfar á og hvort starfsemi bankans sé að nær öllu leyti í samkeppni við einkaaðila.

Í umsögn Samkeppniseftirlitsins er vísað til þess að samkeppnisyfirvöld hafi á undanförunum árum fjallað talsvert um starfsemi viðskiptabanka og aðstæður á fjármálamarkaði og vísar stofnunin til þeirrar umfjöllunar. Þá er rakið að íslenska ríkið fari með 42,5% eignarhlut í Íslandsbanka hf., sem sé keppinautur Landsbankans. Sú staðreynd að tvö eða fleiri fyrirtæki séu í eigu hins opinbera þýði hins vegar ekki eitt og sér að viðkomandi fyrirtæki teljist ekki vera sjálfstæðir keppinautar í skilningi samkeppnisréttarins. Fram kemur að Samkeppniseftirlitið telji Landsbankann vera sjálfstæðan keppinaut á fjármálamarkaði og markaðsaðstæður séu þannig að bankinn sé að öllu leyti í samkeppni við aðra einkaréttarlega aðila sem ýmist séu í eigu hins opinbera eða einkaaðila.

Þá kemur fram að Landsbankanum hafi ekki verið falið að taka stjórnvaldsákvarðanir eða sinna þjónustu sem kveðið er á um í lögum að stjórnvald skuli sinna eða telst að öðru leyti liður í opinberu hlutverki stjórnvalds, sbr. 3. gr. upplýsingalaga, heldur sinni bankinn hefðbundinni bankastarfsemi á almennum rekstrarlegum grundvelli í samkeppni við einkaaðila. Landsbankinn sé þannig einkaréttarlegur aðili sem starfi sem keppinautur á viðskiptabankamarkaði.

Að mati Samkeppniseftirlitsins fer starfsemi bankans eins og áður segir að öllu leyti fram í samkeppni við önnur fjármálafyrirtæki á markaðnum. Ef Landsbankinn væri skyldugur til að hlíta reglum upplýsingalaga um aðgengi almennings að upplýsingum telur Samkeppniseftirlitið hættu á að skapast myndi ójafnræði í

upplýsingamiðlun á samkeppnismarkaði sem óheppilegt væri í samkeppni keppinauta. Brýnt sé að ekki skapist aðstæður sem auðveldi keppinautum að samhæfa starfsemi sína, t.a.m. með því að hluti markaðarins lúti ítarlegri upplýsingaskyldu en gengur og gerist um fyrirtæki á samkeppnismörkuðum.

Að öllu framangreindu virtu hefur forsætisráðherra ákveðið að Landsbankinn hf. skuli áfram vera undanþeginn gildissviði upplýsingalaga, nr. 140/2012. Undanþágan skal endurskoðuð eigi síðar en 1. júlí 2025.

Fyrir hönd ráðherra

Erna Sigríður Sigurðardóttir

Ásthildur Valtýsdóttir

Ljósrit: Samkeppniseftirlitið
Samrit: Fjármála- og efnahagsráðneytið